

կողմից ավելի և ավելի հարկադրական պահանջ, որին ընդդիմադրում էին համեմատաբար խոշոր հողաբաժանների տերերը: Այդ պայքարը մինչև սովետական կարգերի հաստատումը տարեցտարի ստանում էր ավելի և ավելի սուր բնույթ: Պարբերական հողաբաժանությունը ավելի արագ իրացվեց այն գյուղերում և հատկապես Սիսիանում, որտեղ բնակչությունը նորամուտ էր, միայն Թուրքմենչայի դաշնագրությունից հետո էր Պարսկաստանի գանազան գյուղերից վերաբնակվել և նոր հայրենիքում նոր էր ստացել գյուղական հողամաս, որը նա նոր էր բաժանել իր անդամների մեջ:

Կրկնվող հողաբաժանումը մասնավորապես կիրառվում էր Սիսիանի Ուզ գյուղում, որտեղ բոլոր վարելահողերը և խօտհարձը ամբողջապես միացվում էին և ենթարկվում վերաբաշխման:

Իսկ հին տեղական բնակչություն ունեցող գյուղերում երկար ժամանակ գործադրվել է մի այլ սխեմա, որով հողերը մնացել են նախկին տնատերերի ձեռքին և միայն ավելցուկները կտրվել են պակասավոր տնատերերին բավարարելու համար: Հողի բաշխման միջոցին հիմք են ընդունել միայն տղամարդկանց, այն է՝ ընտանիքի ամեն մի ամուսնացած տղամարդը ճանաչվել է որպես առանձին մեկ կրթյուն՝ թեկուզ լինեն 12 տարեկանից փոքր, իսկ աշխատունակ, բայց չամուսնացած տղամարդը, թեկուզ լինեն վարժ մաճկալ, համարվել է կէսկրթյուն: Հօտաղ լինել կարողացող պատանին՝ մի քառորդ գլուխ է ճանաչվել: Մնացած արու զավակները, ինչպես և կանայք, հաշվի չեն առնվել<sup>26</sup>: Զանգեզուրի հայերի հողօգտագործման սխեմայի մեջ խիստ բնորոշ է այն հանգամանքը, որ ընտանիքի միայն արական սեռի ներկայացուցիչներն են հաշվի առնվել, որտեղ թե՛ հողերի և թե՛ ամբողջ շարժական և անշարժ գույքի ժառանգներն են համարվել միայն ու միայն արու զավակները և ոչ թե նաև կանայք<sup>27</sup>: Այս տեսակետով Զանգեզուրը տարբերվել է Երևանյան դաշտի հայ բնակչությունից, որտեղ հողաբաժանության համար հիմք է ծառայել ամպա կոչվող տնտեսական միավորումը, որի մեջ մտել են 16 հոգի՝ թե՛ տղամարդ և թե՛ կին:

Հողաբաժանության միջոցին գյուղը բաժանվել է տասնակների: Նախ պարզվել է, թե որքան հող, վարելահող և խօտհարք ունի յուրաքանչյուր տրնտեսությունը և որքան գլուխ: Այդպիսով պարզվել է համայնքի ունեցած վարելահողերի և խօտհարձի ամբողջ տարածությունը, նույնպես կրթյունների քանակությունը: Մեկ թիվը մյուսով բաժանելով ստացվել է նորմա, այսինքն՝ այն, թե յուրաքանչյուր զխին ինչքան վարելահող և խօտհարձ պետք է հասնի, ապա կազմվել են տասնակները, այնպես, որ յուրաքանչյուրի մեջ գլուխների թիվը լինեն հավասար: Ամեն մի տասնակի ներկայացուցիչ ընտրվել է մեկը, որը կոչվել է դաղբաշի<sup>28</sup>: Բոլոր հողերը բաժանվել են քվեով տասնակների մեջ, իսկ ամեն տասնակի մեջ բաշխումը կատարել է դաղբաշին ինքը: Եթե որևէ տնտեսություն ունենում էր իրեն հասանելիքից ավելի տարածություն, ավելին տրվում էր պակաս ունեցող տնտեսությանը:

<sup>26</sup> Зелинский С. П., նշված աշխ., էջ 51, 52:

Գորիսում ամեն 20—21 տարեկան չափահասության հասած տղամարդը կրթյուն էր: Հայրն ընտանիքից նրա բաժանվելու միջոցին չէր կարող զրկել նրան իր բաժին հողից, մինչդեռ այլ գույքից, շարժական թե անշարժ, նաև այգուց կարող էր բաժին շահնել:

<sup>27</sup> Շատ կարևոր է այս տեսակետով հետազոտել բոլոր հայաբնակ գավառները: Դա կլինի շատ կարևոր աղբյուր և նախորդ, մասնավոր միջին դարերի, ժողովրդական իրավունքի մի քանի առեղծվածները լուծելու համար: